

Pertemuan PAS-Gereja Methodist petang ini ditangguh
The Malaysian Insider
16 Ogos, 2011
Oleh Syed Mu'az Syed Putra

KUALA LUMPUR, 16 Ogos - Pertemuan antara PAS dan Gereja Methodist Damansara Utama dekat Petaling Jaya, yang dijadualkan 4 petang ini, berhubung tindakan Jabatan Agama Islam Selangor (Jais) ke atas premis itu 3 Ogos lalu ditangguhkan.

Setiausaha Agung PAS Datuk Mustafa Ali berkata, pihaknya telah menerima surat daripada pengurusan Gereja Methodist Damansara Utama semalam yang meminta supaya pertemuan petang ini ditangguhkan.

"Sepatutnya hari ini ada pertemuan antara pimpinan PAS dengan Gereja Methodist Damansara Utama tapi semalam saya terima surat daripada pihak gereja menyatakan agar pertemuan itu ditangguhkan.

"Pertemuan itu ditangguhkan, sebab isu ini telah menjadi tumpuan orang dan ditafsirkan macam-macam, pihak gereja minta agar pertemuan itu ditangguhkan dulu dan tarikh baru akan ditentukan kemudian," katanya pada sidang media di sini.

Gereja Methodist Damansara Utama menjadi tumpuan sejak beberapa minggu lalu selepas Jais melakukan pemeriksaan ke atas satu majlis makan malam muhibah anjuran Harapan Komuniti di premis itu.

Jais berkata tindakan mereka hanya bersifat pemeriksaan tetapi pengurusan gereja mendakwa agensi itu melakukan serbuan.

Pemeriksaan itu mendapat bantahan banyak pihak dan kerajaan negeri Selangor di bawah Menteri Besar Tan Sri Khalid Ibrahim meminta satu laporan daripada Jais.

Semalam Jais telah mengambil keterangan dan memberi kaunseling kepada 12 individu beragama Islam yang berada dalam gereja semasa pemeriksaan itu dilakukan.

Tambah Mustafa, disebabkan pertemuan dengan Gereja Methodist Damansara Utama tidak diadakan pihaknya tidak boleh membuat sebarang kesimpulan mengenai apa yang berlaku.

Sebelum ini Jais juga memutuskan untuk tidak mengadakan pertemuan dengan mana-mana pihak termasuk PAS.

"Gereja akan maklumkan kepada PAS bila tarikh lain, hari ini tidak jadi.

"Kita mahu buat pertemuan ini untuk mendapatkan maklumat supaya kita boleh buat kesimpulan tapi oleh kerana tidak bertemu tiada kesimpulan," kata Mustafa.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/pertemuan-pas-gereja-methodist-petang-ini-ditangguh/>